

فريق التفريغ بموقع الطريق إلى الله
يقدم

من سلسلة "صرخات للغافلين"

صرخات للغافلين (4)

(باللهجة المصرية)



لفضيلة الشيخ : د. حازم شومان

رابط المادة: <http://way2allah.com/khotab-item-117269.htm>

السلام عليكم ورحمة الله وبركاته

الحمد لله وكفى وصلاةً وسلامًا على عبادة الذين اصطفى، اللهم لك الحمد كله، ولك الملك كله، وببيدك الخير كله، وإليك يُرجع الأمر كله، اللهم لك الحمد كله، ولك الملك كله وببيدك الخير كله، وببيدك الخير كله، وإليك يُرجع الأمر كله، اللهم صلّ على حبيب قلوبنا، وعلى طيب قلوبنا، وعلى شفيعنا يوم العرض عليك محمد -صلى الله عليه وسلم-، في الأولين وفي الآخرين وفي كل وقت وحين، أما بعد:

إخواني وأخواتي في الله، النهاردة بفضل ومنه الله -سبحانه وتعالى- مع اللقاء الرابع في تفسير سورة الطور، في دورة "صرخات للغافلين" بإذن الله -سبحانه وتعالى-

آيات الجنة

النهاردة مع اللقاء الرابع يا جماعة، وهنبداً مع آيات الجنة بقى، هنبداً مع قول الله -سبحانه وتعالى- "إِنَّ الْمُتَّقِينَ فِي جَنَّاتٍ وَنَعِيمٍ" الطور: 17، هنعيش بقلوبنا الليلة يا جماعة مع ثاني أعظم نعيم في الجنة بعد النظر لوجه الله، نعيم الحياة الاجتماعية في الجنة، ثاني أعظم نعيم في الجنة بعد النظر لوجه الله، هنعيش الليلة بقلوبنا مع برومو عن الجنة جاي مباشرةً من الجنة، برومو يعني زي ملخص كده أو بعض اللقطات اللي تُثير القلب، وتُثير الرغبة المهولة لدخول الجنة، القلب الحي لما يسمع آيات ربنا اللي في سورة الطور عن الجنة هيدوب من الشوق للجنة.

هو ليه قلوبنا ما بتشتقش للجنة!؟

عشان كده أول وقفة هنقفها النهاردة مع بعض يا جماعة واحنا بتتكلم عن الجنة، هو احنا ما بتشتقش للجنة ليه؟ هو احنا لما بنسمع ربنا بيقول: "إِنَّ الْمُتَّقِينَ فِي جَنَّاتٍ وَنَعِيمٍ * فَكِهِينَ بِمَا آتَاهُمْ رَبُّهُمْ وَوَقَاهُمْ رَبُّهُمْ عَذَابَ الْجَحِيمِ * كُلُوا وَاشْرَبُوا هَنِيئًا بِمَا كُنْتُمْ تَعْمَلُونَ" الطور 17: 19، مبنشتقش ليه؟ يعني لو الآيات دي بتتكلم عن نادي من النوادي وبتوصف أصناف النعيم اللي فيه مش قلوبنا هنتلهف عليه؟ لو الآيات دي بتتكلم عن منتج سياحي، والآيات بتوصف مدى الروعة بتاعة أصناف النعيم في المنتج السياحي، قلوبنا مش بتلهف عليه؟ احنا هنتكلم دلوقت من نعيم أَعْظَم منتج سياحي في العالم، مايجيش واحد في الألف منه، ولا مستحيل يقرب منه أصلاً، هنتكلم عن أصناف من النعيم المذهل يا جماعة بإذن الله، بس قلوبنا نسلّمها للقرآن الليلة، نسلّمها للقرآن في قيام الليل بالآيات دي، ونشوف القرآن هيعمل في قلوبنا إيه؟

لو ربنا بيتكلم عن أي صنف من أصناف نعيم الدنيا كنا اشتقنا اشمعنا الآيات بتكلم عن الجنة, وما بنشتقش؟! لأن الجنة لازم نموت عشان ندخلها, واحنا بنكره الموت! لأن الجنة بعيدة حيلني, الدنيا بين إيدنا دلوقتي فاحنا مستبعدينها, مستعجلين عايزين الحاجة العاجلة حتى لو حقيرة والحاجة الآجلة حتى لو عظيمة لأ, لأن الجنة غيب فاحنا مش شايفينها بعيننا, عايزين النهاردة نسنف كل الحواجز دي, عايزين نجري بقلوبنا على الجنة يا جماعة, عايزين نعيش بقى مع تاني أعظم نعيم في الجنة بعد النظر لوجه الله.

ليه ربنا بيكلمنا عن الجنة؟

ولكن فيه وقفة ثانية مهمة جداً, وهي هو ليه ربنا بيكلمنا عن الجنة؟ يعني آيات النار والقيامة المرة اللي فاتت ماخدتش جزء صغير من السورة, إنما آيات الجنة حوالي صفحة, ربنا بيتكلم عن الجنة كثير في السورة هنا ليه؟ -لأن مينفعش يبجي ترهيب من غير ترغيب, لازم الداعي إلى الله يبقى متوازن بين الترغيب والترهيب. -ولأن يا جماعة احنا في عام الحزن, فالقلوب تعبانة والناس تعبانة, والصحابة تعبانين فل لازم نسمع كثير عن الجنة؛ عشان نقدر نصبر على التضحيات اللي احنا بنقدمها في الأيام دي لدين الله -سبحانه وتعالى-.

طب ليه ربنا بيتكلم عن الحياة الاجتماعية بالذات في الجنة؟

كان ممكن يتكلم عن النعيم المادي, ليه الحياة الاجتماعية بالذات؟ - نعيم الأنس, والبهجة, والفرحة, واللمة, والشلة - ليه كده؟ لأن احنا في عام الحزن, فأكثر مرحلة فيها غربة اجتماعية عاشها الصحابة, فجه جزء من جنس العمل, إنتوا هتتحرموا من الحياة الاجتماعية والمجتمع هيعتزلكم عشان دينكم, أنا هديكم حياة اجتماعية لا يتخيلها إنسان لم تخطر على قلب بشر أبداً,

زي ما الرسول -عليه الصلاة والسلام- قال "طوبى للغرباء" صححه الألباني, طوبى دي شجرة في الفردوس الأعلى, ضلها 100 سنة, أكثر من 100 سنة كمان, لأنها نادي اجتماعي بيجتمع فيه أهل الفردوس الأعلى, يعني دي نادي هليوبليس, أو نادي الجزيرة, أو نادي الصيد بتاع أهل الفردوس الأعلى, بيجتمعوا تحتها, طب الرسول قال طوبى لمين؟ للغرباء اللي داقوا الغربة الاجتماعية في الدنيا عشان ينطلقوا إلى الله, بياخدوا الحياة الاجتماعية الباهرة في الجنة "جزء من جنس العمل"

ظاهرتين مذهلتين في الجنة

يلا نبدأ بقى, ولكن برده قبل ما أبدأ الآيات يا جماعة, إنتوا هتشوفوا الآيات وهي على الشاشة بقى, تعيشوا مع ظاهرتين مذهلتين في الآيات, "الحياة الاجتماعية المذهلة, والحب المذهل", قبل ما أبدأ أشرح الآيات لازم نقف مع الظاهرتين دول, وربنا بيتكلم: "إِنَّ الْمُتَّقِينَ فِي جَنَّاتٍ وَنَعِيمٍ" الطور: 17, مش جنة, "فَأَكْبَهِينَ بِمَا آتَاهُمْ رَبُّهُمْ وَوَقَّاهُمْ رَبُّهُمْ عَذَابَ الْجَحِيمِ" الطور: 18, ركزتوا وربنا يقول: "أَلْحَقْنَا بِهِمْ ذُرِّيَّتَهُمْ" الطور: 21, ركزتوا وربنا يقول: "وَرَزَّوْجَهُمْ بِحُورٍ عِينٍ" الطور: 20, ركزتوا وربنا يقول: "يَتَنَازَعُونَ فِيهَا كَأْسًا" الطور: 23, "وَيَطُوفُ عَلَيْهِمْ غِلْمَانٌ"

الطور: 24, "أَقْبَلَ بَعْضُهُمْ عَلَى بَعْضٍ" الطور: 25, ركزتوا في الآيات دَيْتَ, هنقف الأول مع ظاهرتين مذهلتين في الآيات وبعد كده نبدأ ندخل في شرح الآيات .

الظاهرة المذهلة الأولى في الآيات هي: الحياة الاجتماعية المذهلة

جو بهجة وجو شلة

إزاي؟ الجو مبهج أوي يا إخوانا, يعني بين المؤمنين وبعض, ربنا - سبحانه وتعالى - يقول: "فَاكِهِينَ" قاعدين يضحكوا مع بعض, يعني جو بهجة وجو شلة, ربنا يقول: "مُتَّكِنِينَ عَلَى سُرُرٍ مَّصْفُوفَةٍ" قاعدين على عروش المُلْك جنب بعض, جو بهجة.

جو لعب ومرح

"يَتَنَازَعُونَ فِيهَا كَأْسًا" يتنازعون جو لعب ومداعبة ومرح, وده يجري ورا ده يخطف منه علبة العصير أو كأس الخمر, وده يقوم جاي وخاطف الكاس من الاتنين, جو بهجة وجو مرح, "يَطُوفُ عَلَيْهِمْ غِلْمَانٌ" كإنيهم قاعدين في حلقة والغلمان قاعدين يطوفوا داير ما يدور, يبقى جو أنس وجو حفلات وجو مرح.

جو أنس بالصحة والأحباب

يبقى الأنس بالصحة والإخوة والأحباب:

- الأنس بالزوجة

الأنس بالزوجة "وَزَوْجَانَهُمْ بِحُورٍ عِينٍ" كمان مراتك, عشان كده ربنا مقالش زوجناهم حور عين "وَزَوْجَانَهُمْ" ب , الباء هنا دي باء مصاحبة, يعني دلت إن دي زوجته اللي كانت في الدنيا, اللي كانوا متصاحبين في قيام الليل, اللي كانوا متصاحبين في العبادة, اللي كان ممكن ينزلوا جولة, هي توقف البنت تكلمها وهو يوقف الولد يكلمه, يدعوا إلى الله مع بعض,

كانوا متصاحبين في تربيتهم ولادهم على الدين, أنا هحفظهم الجزء الثلاثين, وإنت هتراجعيه لهم, أنا هحفظهم قرآن, وإنت تشرحيلهم سيرة الرسول -عليه الصلاة والسلام- وأمهاات المؤمنين, يبقى كانوا متصاحبين في الدنيا, فيبقوا متصاحبين في النعيم في الجنة, يبقى جو حياة اجتماعية مذهلة ولا أعظم منتج سياحي في العالم والله في شيء من الكلام ده يا جماعة, جو صحبة عظيم, أنس بالصحة, أنس بالزوجة.

- أنس بالأولاد

"أَلْحَقْنَا بِهِمْ ذُرِّيَّتَهُمْ" الطور: 21, أولادك وأحفادك وأحفادك معاك, مبتهجين.

- الأنس بالله

أنس بالله يا جماعة "وَأَمْدَدْنَاَهُمْ بِفَاكِهَةٍ وَلَحْمٍ" الطور: 22, يعني ربنا بيعتلهم أصناف من اللحوم والفواكه مش موجودة في الجنة أصلاً, وهما قاعدين في الحفلة الجميلة بتاعتهم اللي هنوصف فيها اللوقتي بإذن الله, فربنا بيعتلهم

أصناف لم تُخلق في الجنة مثلها أصلاً، **كَانَ رِبْنَا بِيَقُول أَنَا مَعَاكُم، أَنَا مَعَاكُم فِي فَرِحْتِكُمْ، أَنَا مَعَاكُم فِي حَفَلْتِكُمْ، أَنَا مَعَاكُم فِي الْجَوِ الْاجْتِمَاعِي الْمُبْهَرِ دَه، فَيَزِدَاد الْأَنْسُ أَنْسُ بِاللَّهِ، وَبِمَعِيَةِ اللَّهِ -سَبْحَانَهُ وَتَعَالَى-**.

- الأنس بالملائكة

الملائكة **"كُلُوا وَاشْرَبُوا هَنِيئًا بِمَا كُنْتُمْ تَعْمَلُونَ"** الطور: 19، مين اللي بيقول؟ الملائكة، يعني الحفلة مليانة ملايكة، في الدنيا كنا بنصلي ومش شايفين الملائكة، بنقوم الليل ومش شايفين الملائكة، بندعوا إلى الله ومش شايفين الملائكة، بنجاهد في سبيل الله ومش شايفين الملائكة، إنما النهاردة في الجنة الملائكة حوالينا شايفينهم، اللهم ارزقنا الفردوس الأعلى يارب، اللهم لاتحرمنا من هذا النعيم بعد أن شوقتنا إليه يارب، يبقى أنس بالله، أنس بالملائكة، أنس بالصحة والشلة، أنس بالزوجة، أنس بالأولاد.

- الأنس بالخدم

كمان من ضمن الحياة الاجتماعية الخدم **"وَيَطُوفُ عَلَيْهِمْ غِلْمَانٌ لَهُمْ كَأَنَّهُمْ لُؤْلُؤٌ مَّكْنُونٌ"** الطور: 24، يعني جو حياة اجتماعية خدم وخدم بقي مش أي حاجة ده لؤلؤ مكنون يعني جمال الجمال يعني، يعني أجمل من ملوك الدنيا وأمراء الدنيا وأميرات الدنيا وبيطوف هؤلاء الغلمان اللي **"كَأَنَّهُمْ لُؤْلُؤٌ مَّكْنُونٌ"**، يبقى أول ظاهرة مذهلة ظاهرة الحياة الاجتماعية المذهلة في الآيات.

الظاهرة الثانية المذهلة: ظاهرة الحب المذهل في الآيات

أولاً: جو الحب مع الزوجة

لأن ممكن يبقى حياة اجتماعية، يعني ممكن تحضر حفلة مثلاً لجو اجتماعي عالي، بس متحسش إن الناس بتحب بعض، الناس مُتجمعة بس مافيش حب، مافيش العواطف الملتهبة بينهم وبين بعض، جو الحب المذهل، إزاي بقي يا إخوانا؟ يعني جو الحب المذهل **"وَرَزَوَّجْنَاهُمْ بِحُورٍ عِينٍ"** الطور: 20، حب مراتك، كلمة حور أصلاً، من ضمن الجزور اللغوية للهور، حار أي مال إن قلبها مايل ليك وإنت قلبك مايل ليها، يعني جو الحب العظيم ياجماعة مع الزوجة.

ثانياً: جو الحب مع الأولاد

جو الحب العظيم مع الأولاد **"وَأَقْبَلْ بَعْضُهُمْ عَلَى بَعْضٍ يَتَسَاءَلُونَ"** الطور: 25، هو وأولاده وأحفاده وذريته، أقبال، الإقبال ده إن قلبك سابق رجلك، يبقى جو الحب.

ثالثاً: جو الحب مع الخدم

حتى الخدم **"وَيَطُوفُ عَلَيْهِمْ غِلْمَانٌ لَهُمْ"** الطور: 24، يعني كتير من الملوك ليهم خدم بيخدموهم وهما كارهينهم وكارهن عجرفتهم وكبرهم وتعتنهم ولهوهم، إنما هنا يطوف رايح جاي رايح جاي، بيخدمك بقلب بيخدمك بحب.

رابعاً: جو الحب مع الملائكة

الملايكة **"كُلُوا وَاشْرَبُوا هَنِيئًا"** الطور:19، بالهنا والشفاء، الكلمة اللي والدتك بتقولها لك وإنت بتاكلي، بالهنا والشفاء
يا بني، **"كُلُوا وَاشْرَبُوا هَنِيئًا"** يعني إنت في وسط جو حب رهيب من الملائكة، وحب عظيم زوجتك وزوجك وحب عظيم من ولادك وعيلتك، وحب عظيم من الخدم اللي بيخدموك.

خامسًا: حب الصحبة نفسها

"مُتَّكِنِينَ عَلَى سُرُرٍ مَّصْفُوفَةٍ" الطور:20، قدام بعض، يعني حب عظيم، يعني الواحد لو مش بيحب واحد مش عايز يبقى في وشه، مش عايز يبقى جنبه، حب عظيم ما بين الصحبة وبعضها.

سادسًا: حب من الله

"وَأَمَدَدْنَاَهُمْ بِفَاكِهَةٍ وَلَحْمٍ مِّمَّا يَشْتَهُونَ" الطور:22، ربنا بيمنعهم، ربنا بيبيهم، يعني ناس حياتها مليانة حب، أرض الحب اللي هي الجنة، أرض الحب اللي هي الفردوس الأعلى.

يبقى الظاهرتين المذهلتين، اللي هما ظاهرة الحياة الاجتماعية المذهلة، وظاهرة الحب المذهل، ده دي كل اللي فات في الحلقة مقدمة إن احنا نعيش بقلوبنا مع البرومو بتاع الجنة اللي جاي لنا من الفردوس الأعلى، عشان نشوف بقى الآيات مش بتوصف مجتمع سياحي ولا بتوصف نادي ترفيهي ولا بتوصف قصر من قصور الملوك والأمراء، الآيات بتوصف أهل الفردوس الأعلى عايشين إزاي، يارب شوقنا للجنة، يارب متعنا بالفردوس الأعلى يارب اللهم آمين.

نبدأ بقى رحلة ماتهة مع الآيات

ناخذ آية آية:

1- "إِنَّ الْمُتَّقِينَ فِي جَنَّاتٍ وَنَعِيمٍ" الطور:17

تأكيد حصول النعيم

إن إيه؟، السورة فيها اتنين إن: - **"إِنَّ عَذَابَ رَبِّكَ لَوَاقِعٌ"** الطور:7 و **"إِنَّ الْمُتَّقِينَ فِي جَنَّاتٍ وَنَعِيمٍ"** بعد الخمس أقسام اللي في أول السورة، كان ربنا بيقسم على **"إِنَّ عَذَابَ رَبِّكَ لَوَاقِعٌ"** و **"إِنَّ الْمُتَّقِينَ فِي جَنَّاتٍ وَنَعِيمٍ"** يعني ربنا بيؤكد إن النعيم ده هيحصل هيحصل، **"إِنَّ الْمُتَّقِينَ"**

المتقين دول أعلى المراتب

يعني أول المقامات: المسلمين، الأعلى: المؤمنين، الأعلى: المحسنين، الأعلى: المتقين، يعني الآيات دي بتتكلم عن الفردوس الأعلى مش النعيم العام للجنة، أحسن واحد نايم على جنبه وقاعد دلوقتي يبص كده وهو ماسك السيجارة وبيطلعها ويدخلها وحياته معاصي وليله معاصي ونهاره معاصي، ويقول يا سلام ده الجنة والله لذيذة، حبيبي

ده الفردوس الأعلى, الكلام ده له تمن, مش كل واحد بيحب الطب يبقى دكتور اللي بيحب مجموع طب, مش كل واحد بيحب الهندسة يبقى مهندس اللي بيحب مجموع هندسة, مش كل واحد بيحب الفردوس الأعلى بيدخلها اللي بيحب مجموع الفردوس الأعلى, مجموع الفردوس الأعلى ممكن دعوة, اللهم ارزقنا الفردوس الأعلى يارب, دعوة ربنا يستجيبها ولكن لازم ندفع التمن.

نعيم التنوع

"إِنَّ الْمُتَّقِينَ فِي جَنَّاتٍ وَنَعِيمٍ" نعيم التنوع بقى

طب في سورة الذاريات كان فيه جنات وعيون ليه؟

لأن الذاريات بتتكلم عن الرزق والعيون منابعها مش متشافة, إنما الثمرة النهائية بتاعتها متشافة فده مثل للرزق, إن الرزق ملكش دعوة رزقك هيجي منين, هو هيجي هيجي, إنت ليك إن هيجي بس ملكش دعوة طالع منين, فناسب هذا آيات الجنة مع الذاريات, إنما هنا احنا بتتكلم عن البهجة ونعيم, أصناف النعمة الذي لا يوجد فيها منغصات.

2- "فَاكِهِينَ بِمَا آتَاهُمْ رَبُّهُمْ وَوَقَاهُمْ رَبُّهُمْ عَذَابَ الْجَحِيمِ" الطور: 18

– الجنة لها تمن لازم ندفعه

"فَاكِهِينَ بِمَا آتَاهُمْ رَبُّهُمْ" الآيات بتوصف هنا حفلة اجتماعية في الجنة, حفلة بقى, يارب لو دخلنا الفردوس الأعلى أنا هعمل الحفلة دي معاكم يا جماعة إن شاء الله, أنا عازمكم في القصر بتاعي إن شاء الله لو دخلنا الفردوس الأعلى, وأستاذ ياسر بإذن الله – سبحانه وتعالى – وإخوانا وكل اللي اشتغلوا في فرق العمل بإذن الله يارب اللهم آمين, يارب مع الحبيب محمد – عليه الصلاة والسلام – يارب, لو دخلنا الفردوس الأعلى يا جماعة بس نجهد بقى ونضحى يا جماعة ونبيع الدنيا ونطلقها,

ونطلق في الدين وفي الأخوة وفي الدعوة وفي العبادة ونترى عشان نقدر نمشي على الطريق ونرتبط بالقرآن ونطلع عمرة, يا جماعة الجنة ليها تمن خلونا ندفعه, والله العظيم هنكتشف في الآخر إنها كانت سهلة أوي واللي مجتهدش هيندم, اللي كان مستصعب تمن الفردوس الأعلى هيندم, هيقول ده كان بمجهود مش كبير كان ممكن أنالها, يلا يا إخوانا هعزمكم على الحفلة دي بإذن الله إن شاء الله تفكرون في الجنة بإذن الله لو دخلنا الفردوس الأعلى يارب اللهم آمين .

– أول حفلة في الجنة

"فَاكِهِينَ بِمَا آتَاهُمْ رَبُّهُمْ" زي ما في آيات القيامة قلنا دي أول لحظات البعث اللي هو أول مرحلة في القيامة, وفي آيات النار قلنا دي أول لحظات النار, كذلك في الجنة دي حفلة الجنة اللي ممكن نحملها على أول حفلة في الجنة, أول حفلة حد منا عازمنا, عازم الشلة بتاعته في الجنة فبداية المشهد الكاميرا جابت الأول المنظر زي ما

يعمل بقى المخرجين الشاطرين بقى والمصورين الشاطرين ويقوم جايلك المنظر من بعيد تلاقي المكان كبير وكله نعيم في نعيم وبعد كده يقوم عامل Zoom In على قصر واحد من القصور ديت، تُفاجأ بقى إن المشهد يُفتتح.

شوفوا التصوير المهول في القرآن.

"فَاكِهِينَ بِمَا آتَاهُمْ رَبُّهُم" شله قاعدة بقى فرحانين ويضربوا كف بكف في الحفلة بتاعتهم، "فَاكِهِينَ" قمة الفكاهة والمرح اللي طالع من القلب، "بِمَا آتَاهُمْ رَبُّهُم آتَاهُمْ رَبُّهُم وَوَقَّاهُمْ رَبُّهُم عَذَابَ الْجَحِيم".

—باء السببية

"بِمَا آتَاهُمْ رَبُّهُم" ب باء السببية يعني بسبب اللي ربنا عمله لهم، ربنا فرحهم.

—كلمه غامضة بتدخل تحتها كل أحاديث آيات الجنة

"بِمَا آتَاهُمْ رَبُّهُم" يا جماعه كلمه غامضة ولكن كل آيات الجنة وكل أحاديث الجنة بتدخل تحتها "فَاكِهِينَ" قاعدين بقى ينوعوا، شفتوا الحور اللي ربنا اداهم لهم، شفتوا القصور، شفتوا الأنهار، شفتوا الأشجار، شفتوا تفاح الجنة، شفتوا ال شفتوا النظر لوجه الله كانت قلوبكم مرفرفة فيه إزاي، شفتم صحبة الأنبياء في الفردوس الأعلى، شفتوا الأحجار الكريمة اللي احنا بندوس عليها.

—مَا التَعْظِيم

"بِمَا" ما للتعظيم بقى والتهويل "آتَاهُمْ رَبُّهُم".

— وصف النعيم والعذاب

قاعدين ييفتكروا الجنة ملمح ملمح "وَوَقَّاهُمْ رَبُّهُم عَذَابَ الْجَحِيم" وييفتكروا النار ملمح ملمح، طب هما شافوا النار فين وهما معدين من على الصراط شافوا النار والناس اللي بتتحرق في النار وألسنة لهب النار والناس اللي بتتحرق في النار ومقامع النار فقاعدين بيحمدوا ربنا على صنف صنف من أصناف العذاب ربنا نجاهم منه الحمد لله، شفتوا المقامع فظيعة إزاي، شفتوا عقارب النار وحياتها، شفتوا زنازين جهنم، شفتوا لما بيطلعوا على أهل النار ويشوفوا أهل النار بيتعذبوا إزاي، بيشفوا أصناف عذاب مروعة فقاعدين بقى فرحانين وقاعدين يوصفوا في النعيم اللي هما فيه والعذاب اللي نجوا منه.

على ماذا تدل كلمة "وَوَقَّاهُمْ"؟

وكمان "وَوَقَّاهُمْ" دلالة إن الناس دي دخلت الجنة بلا حساب ولا عذاب، إن الناس دي دخلت الجنة بلا حساب ولا عذاب، طب ولا عذاب ففرحانين برده غير بإنهم نجوا من النار وأصنافها إنهم لم يمستهم العذاب بلا حساب ولا عذاب، طب ربنا الأول ذكر تفكهم وفرحتهم بالجنة والا بالنجاة من النار؟ لا بالجنة الأول ذكر تفكهم بالجنة الأول وبعدين بالنجاة من النار طب، ليه؟ رغم إن النجاة من النار المفروض إنها أعظم، لأ كأن أهل الجنة حينما دخلوا الجنة

علموا أنّ الحرمان من نعيم الجنة بعد أن رأوه عذاب أشد من عذاب النار فحمدوا ربنا على الجنة قبل أن يحمدوا ربنا على النجاة من النار.

3- "كُلُوا وَاشْرَبُوا هَنِيئًا بِمَا كُنْتُمْ تَعْمَلُونَ" الطور: 19

بعد كده الحفلة الملايكة سمعت بالحفلة قامت الملايكة جاية بقى بأصناف الولايم وداخلة عليهم "كُلُوا وَاشْرَبُوا هَنِيئًا".

الهناءة خلو الحياة من المكدرات النفسية والبدنية

الهناءة دي حلم البشر كلهم, يعني إيه الهناءة؟ يعني إيه كل بالهناءة؟ يعني إيه الهناءة يا جماعة؟ يعني إيه نفسي أتهنى؟ الهناءة هو خلو الحياة من المنغصات والمكدرات, إنَّ إنت مفيش خبر وحش تسمعه, مافيش حاجة مضايقتك, مافيش حاجة شاغلة بالك وإنت قاعد, مفيش حاجة كده موتراك,

يبقى الهناءة خلو الحياة من المنغصات والمكدرات فدي الحالة دي في الجنة بقى, شوفتوا حالة الهناءة اللي الناس هتموت عليها دي في الجنة, "كُلُوا وَاشْرَبُوا هَنِيئًا" منتش خايف بقى تاكل ديك رومي وبعدين بقى تلاقى القولون اشتغل والقولون العصبي ولا عصر هضم ولا الحقوني من الحموضة يعني مفيش مكدرات بدنية ولا مكدرات نفسية خالص خالص.

- با السببية "بِمَا"

"هَنِيئًا بِمَا كُنْتُمْ تَعْمَلُونَ" الباء هنا باء السبب يعني إيه باء السبب؟ يعني اللي انتوا فيه ده بسبب الطاعة, الطاعة هي السبب ولكنها ليست السر, السر رحمة الله, فأنتم تتعمون على قدر رحمة الله وليس على قدر عملكم, علشان كده الجنة دي تجلي من تجليات قدرة الله, الجنة دي مش مخلوقة على قد شغلك, ده تجلي لقدرة وبرحمة الله, متعنا بالجنة يارب, متعنا بالجنة يارب.

4- "مُتَكَبِّرِينَ عَلَى سُرُرٍ مَّصْفُوفَةٍ ۖ وَرَوَّجْنَاهُمْ بِحُورٍ عِينٍ" الطور: 20

الجلوس على سرر كالمملوك

"مُتَكَبِّرِينَ عَلَى سُرُرٍ مَّصْفُوفَةٍ" منظر الأخوة بقى "مُتَكَبِّرِينَ" يعني قاعدين كده بشوات ملوك "عَلَى سُرُرٍ" كنت بشرح الآيه دي لحد من إخواني لاقيته فاكر إن السرر يعني السرير اللي بننام عليه, سرير أبو مخدة ومرتبة ده, لا يا جماعة السرير في اللغة هو عرش الملك, سرير الملك هو عرش الملك يعني "مُتَكَبِّرِينَ عَلَى سُرُرٍ" يعني قاعدين على عرش الملك.

يعني الأخوة الغلابة والأخوات الغلابات, يعني اللي كان ممكن بتشيل من ميزانية بيتها عشان تجيب الجوانتي الأسمر, والشراب الأسمر, عشان العفاف, دول بقوا ملوك يا جماعة, دول بقوا ملوك, يعني اوعى لما تدخل درس

ديني تبص بقى للأخوه الفقراء لا أنا عايز أخ شيك غني مودرن زي الشله القديمة بتاعتي, يا بنى الغلابة المساكين دول هيقوا بكرة ملوك الفردوس الأعلى, هتتمنى إنك تتمحك فيهم.

نعيم التميز بالأعمال الصالحة

"مُتَكَبِّينَ" على سرر عروش ملك مصفوفة, بعض الناس تفكر كده وتقلك يعني أنا هبقى ملك في الجنة, آه طيب هبقى ملك في الجنة برده مش نعيم كبير ليه؟ لأن في الدنيا إن أنا أبقى ملك الناس كلهم عبيد, الناس كلهم عاديين يعني فلما هبقى ملك هبقى مميز, إنما في الجنة الكل ملك الكل بقى المستوى العام ومستوى الدخل في الجنة إن الكل ملك, لا يا جماعة الجنة فيها نعيم تميز, اوعوا تفتكروا إن الجنة كل الناس زي بعض فيها, الجنة فيها نعيم تميز رهيب ما بين الناس وبعض ولكن الدنيا كان تميز ابتلاء بدون أسباب ده طلع بن ملك كده وماشتغلش عشان يطلع بن ملك, إنما في الجنة التميز بالأعمال الصالحة, فالجنة فيها تميز رهيب "مُتَكَبِّينَ" وده من أصناف نعيم الجنة.

جاءت جلسة الأخوة قبل الزواج

"مُتَكَبِّينَ عَلَى سُرُرٍ مَّصْفُوفَةٍ ۖ وَزَوَّجْنَاهُم بِحُورٍ عِينٍ" هنا يعني النقطة الجميلة أوي إن ربنا ذكر جلسة الأخوة قبل الزواج كأن نعيم الأخوة في الله ألد على القلب من نعيم الزواج من حورية من الحور العين, أي والله يا جماعة لأن الأخوة في الله اتصال بالله أصلاً, أنا محبتكش غير عشان إنت بتحب ربنا فأنا أساساً إنما أحب الله فكأن اتصالي بك ما هو إلا اتصال بالله - سبحانه وتعالى -, إنما الزواج ده نعيم جسدي نعيم جسدي, فالأخوة عشان كده اتمسكوا ببعض يا جماعة, اتمسكي بأخواتك, اتمسكي, يعني إنت بقى ممكن مستنية الزواج في الجنة وزوجي في الجنة يبقى شكله إيه؟ وقوته إيه؟ وجماله إيه؟ وملكه إيه؟

يا بنتي الأخوة في الله, يا بني الأخوة في الله, اتمسكوا ببعض يا جماعة, إشارة مهولة لأن الأخوة دي الأخوة المذكورة في آيات الجنة أهو, الأخوة من أصناف نعيم الجنة بل ذكرت قبل نعيم حور العين ونعيم الزواج, يعني حاجة عظيمة, يعني لا يوجد ملمح على وجه الأرض من الجنة إلا أختك, إلا أخوك, يبقى الأخوة دي المتعة الوحيدة من متع الجنة اللي موجودة في الدنيا, المتعة الوحيدة التي أذن الله أن تتمتع بيها من الجنة في الدنيا هي الأخوة في الله, إزاي مبدلش وقتنا لبعض, إزاي منبوسش إيدين بعض, إزاي منبوسش راس بعض, إزاي منكسرش لبعض ونرعى أخوتنا في الله يا إخواننا؟!.

"مُتَكَبِّينَ عَلَى سُرُرٍ مَّصْفُوفَةٍ ۖ وَزَوَّجْنَاهُم بِحُورٍ عِينٍ", "زَوَّجْنَاهُم بِحُورٍ"

كلمة الحور لها 3 معاني:-

- كلمة حور ديت, يعني لما نيحي نبص في اللغة كده نلاقي حور من حيرة العين والقلب أمام جمال الملامح, يعني دلالة على شدة جمال ملامحها, وهيحي لفتة اللوطني على شدة جمال الزوج برده.

-الحاجة الثانية، الحور شدة البياض، شدة بياض لونها، شدة بياض لونها.

- الحاجة الثالثة، حور العين شدة بياض النبي مع شدة بياض العين مع شدة سواد النبي يبقى شدة جمال العين والحور من الميل، معنى الميل يعني شدة العواطف اللي في قلبها ناحيتك.

يعني عظمة جمال ملامحها وعظمة جمال لونها وعظمة جمال عينيها وعظمة جمال مشاعرها في كلمه واحدة

من 3 حروف، الله أكبر، الله أكبر! "وَزَوَّجْنَاهُمْ بِحُورٍ عِينٍ".

طب ما جمال العين ضمن وصف الحور ليه حُص بعد عموم لفظ عين؟ لأن العين دي لغة المشاعر والعين دي أكثر حاجة بتشد الواحد للي قدامه، العين دي حاجة جميلة أوي فخص شدة جمال العين لأن العين دي يعني أجمل ملمح في الإنسان.

5- "وَالَّذِينَ آمَنُوا وَاتَّبَعَتْهُمْ ذُرِّيَّتُهُمْ بِإِيمَانٍ أَلْحَقْنَا بِهِمْ ذُرِّيَّتَهُمْ وَمَا أَلَتْنَاهُمْ مِنْ عَمَلِهِمْ مِنْ شَيْءٍ ۚ كُلُّ امْرِئٍ بِمَا كَسَبَ رَهِينٌ" الطور: 21

ثمرة الاجتهاد في تربية الأولاد

"وَالَّذِينَ آمَنُوا وَاتَّبَعَتْهُمْ ذُرِّيَّتُهُمْ بِإِيمَانٍ أَلْحَقْنَا بِهِمْ ذُرِّيَّتَهُمْ وَمَا أَلَتْنَاهُمْ مِنْ عَمَلِهِمْ مِنْ شَيْءٍ" إن الإنسان اللي آمن واجتهد على تربية أولاده اجتهاد شديد فطلع أولاده متدينين ولكن أقل منه في العمل فهما يستاهلوا أصحاب اليمين وهو دخل في الفردوس الأعلى "أَلْحَقْنَا بِهِمْ ذُرِّيَّتَهُمْ" ربنا يلحق الذرية بيهم وفي قراءة "أَلْحَقْنَا بِهِمْ ذُرِّيَّتَهُمْ" يعني ولادهم وولاد ولادهم وأحفادهم وأحفاد أحفادهم وأحفاد أحفادهم، يعني ألحق بيهم العيلة كاملة، اجتمعت الأسرة في الجنة.

يعني إيه "وَمَا أَلَتْنَاهُمْ"؟

"وَمَا أَلَتْنَاهُمْ مِنْ عَمَلِهِمْ مِنْ شَيْءٍ" يعني إيه؟ "وَمَا أَلَتْنَاهُمْ" الألة في اللغة يعني في جذور اللغة بتاعتها فيها معنى النقص "وَمَا أَلَتْنَاهُمْ" ما أنقصناهم من عملهم من شيء، يعني متخافش يا أب مش معنى إن أنا أطلع ابنك في الفردوس الأعلى إن أنا هاخذ من حسناتك وأدليه فيطلع، لأ إنت مش هتنقص حاجة، إنت زي ما إنت في المقام العالي وابنك هو اللي هيطلع لك.

الألة اللي فيها زر الشد أو الشدة يعني "وَمَا أَلَتْنَاهُمْ" مش هتشد عليك في الحساب، لو ربنا شد في الحساب على أعظم الصالحين وفتش في سوءات أعمالهم لذهبت أعمالهم أصلاً يعني الحساب اليسير الجميل متخافوش يا جماعة، الحساب اليسير الجميل.

"وَمَا أَلَتْنَاهُمْ" برده من معنى جزور الألة الربط يعني ما ربطناهم، يعني إبتوا عارفين يا جماعة لما واحد عشان في واحد فراح كده عشان بقى إنه يديله فيرد يقول له امشي من هنا، لأ مش هرد عشم هؤلاء الآباء الصالحين في رحمتي، مش هرد عشمهم فمحافظلهم على حسناتهم وهديهم ولادهم معاهم.

يبقى "وَمَا أَلْتَنَاهُمْ": ما أنقصناهم من عملهم من شيء "وَمَا أَلْتَنَاهُمْ": مكسفناهمش، مخييناش رجاءهم في حنانا ورحمتنا، "وَمَا أَلْتَنَاهُمْ": ما شددنا عليهم في الحساب بل حاسبناهم حسابًا يسيرًا، "وَمَا أَلْتَنَاهُمْ مِّنْ عَمَلِهِمْ مِّنْ شَيْءٍ ۗ" مطلقًا.

كل رهن عمله الصالح يوم القيامة

"كُلُّ امْرِئٍ بِمَا كَسَبَ رَهِيْنٌ" الطور: 21 يعني إيه "كُلُّ امْرِئٍ بِمَا كَسَبَ رَهِيْنٌ" الطور: 21 لأ ده احتراز بقى إن دول ذرية مش بنفس درجة تدين الآباء ولكن ذرية صالحة، طب ولو الذرية فاسدة برده يا رب هتدخلهم الفردوس الأعلى مع آبائهم؟ لأ، ليه؟ "كُلُّ امْرِئٍ بِمَا كَسَبَ رَهِيْنٌ" الطور: 21 يعني إيه يا إخواني؟ رهين يا إما من الرهينة يعني المحبوس، كل إمري محبوس بعمله، "لا تزولُ قدما عبدٍ يومَ القيامةِ حتَّى يُسألَ عن أربعٍ" حسنه وصححه الألباني، محبوس مش هيتفك، مش هيفكه غير عمله، إيه العمل اللي هيفك قدمك يوم القيامة؟، يبقى الابن الفاسق مش هيدخل الجنة مع أبوه، يا إما رهين من الرهان أي المسابقة والمخاطرة يعني كل واحد داخل مخاطرة يوم القيامة بمركب العمل الصالح، إيه مركب العمل الصالح اللي إنت هتركبيه عشان تنجى يوم القيامة؟ "كُلُّ امْرِئٍ بِمَا كَسَبَ رَهِيْنٌ" الطور: 21

6- "وَأَمْدَدْنَاَهُمْ بِفَاكِهَةٍ وَلَحْمٍ مِّمَّا يَشْتَهُونَ" الطور: 22

"وَأَمْدَدْنَاَهُمْ بِفَاكِهَةٍ وَلَحْمٍ مِّمَّا يَشْتَهُونَ" الطور: 22، أمددناهم مدد ربنا - سبحانه وتعالى - في هذه الحفلة المبهجة اللي الأولاد فيها والزوجة فيها والأصحاب والملايكة فيها، ربنا كمان بيعتلهم أصناف من الفواكه واللحوم لم يخلق مثلها في الجنة؛ عشان يمتعهم والفاكهة قبل اللحم لأن أهل الجنة مياكلوش اللحم عن جوع وإنما عن تفكه؛ عشان كده لما قالك هو فيه نوم في الجنة؟ فمن أجمل الأقوال قالوا النوم اللي على سبيل الراحة بعد الإجهاد والتعب وعايظه أريح ليس بموجود إنما يوم التلذذ والتنعيم بقى ده اللي ممكن يبقى موجود في الجنة.

"وَأَمْدَدْنَاَهُمْ بِفَاكِهَةٍ نَكْرَةً لِلتَّعْظِيمِ" "وَلَحْمٍ" نَكْرَةً لِلتَّعْظِيمِ "مِّمَّا يَشْتَهُونَ" الطور: 22.

7- "يَتَنَازَعُونَ فِيهَا كَأْسًا لَا لَعْوُ فِيهَا وَلَا تَأْتِيْمٌ" الطور: 23

معنى كلمة يتنازعون

"يَتَنَازَعُونَ فِيهَا كَأْسًا لَا لَعْوُ فِيهَا وَلَا تَأْتِيْمٌ" الطور: 23، "يَتَنَازَعُونَ" يا جماعة لفظ غريب جدًا كثير من المفسرين وقفوا قدامه قال يعني إيه يتنازعون؟ فقالوا حاجة من اتنين:-

-المعنى الأول: المجاذبة والمداعبة

يا إما يتنازعون من المجاذبة والمداعبة، إنتوا عارفين كل واحد بقى ده يخطف حنة اللحم من ده يقوم ده يخطفها منه، يقوم التالت يخطفها منه، يا عم طب ما اللحم كثير والشرب كثير والعصير كثير والنعيم كثير، جو البهجة والفرح يا إخواننا، جو المرح، الجو ده مش موجود في الدنيا، مفيش حرف واحد ولا لفظ في الآيات اللي احنا

فيها دية موجود زيه في الدنيا، يتنازعون يتنازعون جت بالمضارع؛ عشان استحضار المشهد كأنك تبصي كده وتسرحي كده إيه الجمال ده، إيه المنظر المبهج ده.

لو جبتلك تصوير مثلاً من نادي من النوادي والشباب قاعدين يجروا ورا بعض ويضحكوا وده يخطفها ويجري ويضحك وكلهم نايمين في الأرض من الضحك، هتقول ياه أنا عايز أروح النادي ده يا ريتني كنت جزء من المشهد اللي أنا شايفه، قلوبنا مبتأثرش ليه يا جماعة، قلوبنا مبتخلعش ليه يا جماعة؟! مينعاهدش ربنا على إن احنا هنعيش عشان نوصل لده ليه يا جماعة، اللهم ارزقنا الفردوس الأعلى مع الحبيب محمد يارب

-المعنى الثاني: الأخوة والإيثار

"يَتَنَازَعُونَ" المعنى الثاني بقى قال لك التنازع اللي فيها تطاوع اللي هو يعطون كؤوس الخمر لبعضهم البعض يعني ده معنى تاني خالص غير معنى البهجة والفرح، معنى الأخوة والإيثار اللي هو قدامه كأس خمر عاجبه قوي يقوم بيديه لأخوه فيناولون بعضهم البعض أصناف النعيم، يبقى يا إما معنى الأخوة والإيثار، يا إما معنى وإن كان الجنة كل حاجة فيها وفرة يا إما معنى البهجة والفرح.

دلالة كلمة فِيهَا

"يَتَنَازَعُونَ فِيهَا كَأْسًا" الطور: 23، هو إيه كلمة فيها دي يا جماعة، يعني إيه كلمة فيها؟ يعني ما يتنازعون كأسًا وخلاص، فيها دي إنت عارف مثلاً أما أروح أمريكا أقوم أقول لك إيه أمريكا في أمريكا بقى المواصلات شغالة كذا، في أمريكا البديل كذا، في أمريكا نظام الحياة كذا، أنا بشوقك، بشوقك، "يَتَنَازَعُونَ فِيهَا" كلمة فيها دي بتقوم واخدة قلبك من صدرك كذا حطاه في الجنة بقى.

"يَتَنَازَعُونَ فِيهَا كَأْسًا" الطور: 23، نكرة للتعظيم مش أي كأس ده ربنا ياترى يا جماعة الجلي بتاع الجنة شكله إيه التحف والأنتيكات بتاعة الجنة؟، أنا ليه واحد صاحبي عنده محل جواهرجي كبير جداً لما بدخل فيه بتوه، هوا البشر عملوا كل ده عشان تحف وأنتيكات أمال الجنة بقى!؟

لا لغو فيها

"يَتَنَازَعُونَ فِيهَا كَأْسًا لَا لَغْوٌ فِيهَا وَلَا تَأْتِيمٌ" الطور: 23، إيه لا لغو فيها؟ من أجمل معاني اللغو الشيء الذي لا خير فيه، الشيء الذي لا فائدة فيه، فالناس دي كانت في الدنيا ناس هدفية جداً كل أقوالها لها هدف، كل أفعالها فيها هدف، ناس كانت حياتها فيها جدية عكس بقى الذين هم في خوض يلعبون، فيقضوا حياة الجنة بدون أي حاجة تعطلهم عن النعيم، أي حاجة تعطلهم عن هدف النعيم وهدف ذكر الله والحياة مع الله، "لَا لَغْوٌ فِيهَا وَلَا تَأْتِيمٌ".

8- "وَيَطُوفُ عَلَيْهِمْ غِلْمَانٌ لَهُمْ كَأَنَّهُمْ لُؤْلُؤٌ مَّكْنُونٌ" الطور: 24.

يطوف يا جماعة حاجة من اتنين:

-يا إما قاعدين في حلقة قاعدين بيضحكوا، فالغلمان بيطوفوا حواليتهم يسقوا واحد واحد.

يا إما يطوفوا رايعين جاينين رايعين جاينين.

الجزء من جنس العمل:

الآية دي دائماً بفتكرها لما بروح الكعبة مع الطواف, إن احنا بنطوف في عبادة ربنا في الدنيا فالجزء من جنس العمل ربنا يدنا اللي يطوفوا علينا بالنعيم في الجنة **"وَيَطُوفُ عَلَيْهِمْ غِلْمَانٌ لَّهُمْ"** دول خدم ليهم في الجنة, الغلمان دول يا جماعة خدم مخلوقين زي الحور العين بالظبط, صنف من أصناف النعيم, مخلوق في الجنة عشان يخدمهم طب هما دول زي سورة الإنسان **"وَيَطُوفُ عَلَيْهِمْ وِلْدَانٌ مُّخَلَّدُونَ إِذَا رَأَيْتَهُمْ حَسِبْتَهُمْ لُؤْلُؤًا مَّنشُورًا"** الإنسان:19.

إيه الفرق بين الغلمان والولدان؟

بعض المفسرين قال الولدان المخلدون دول أولاد المسلمين اللي ماتوا وهما أطفال, فرينا - سبحانه وتعالى - يجيبهم مع أهاليهم وهما أطفال في الجنة يفضلوا أطفال في الجنة في نفس المرحلة ديّت, ويبقوا بقى من أصناف النعيم العظيمة لأهليهم في الجنة, دا قول من الأقوال.

عشان كده ربنا مع الغلمان اللي هما المخلوقين في الجنة صنف نعيم قال لؤلؤ مكنون ليه؟ لأن هما زي الحور المقصورات في الخيام, لأن هما صنف نعيم يفضل في القصر بتاع سيده.

إنما الولدان لأن هما بشر فلهم ملك ونعيم دول ملوك في الجنة برده, **"وَيَطُوفُ عَلَيْهِمْ وِلْدَانٌ مُّخَلَّدُونَ"** بس يجيبوا أهاليهم فقاعدين يطوفوا على أهاليهم إنما هما برده ملوك في الجنة ومتنعمين, مش فيه في الدنيا كان ملوك وهما أطفال أبوه مات وبقى وهو عنده 10 سنين و 12 سنة ملك من ملوك الدنيا.

فالثانية **"وَيَطُوفُ عَلَيْهِمْ وِلْدَانٌ مُّخَلَّدُونَ إِذَا رَأَيْتَهُمْ حَسِبْتَهُمْ لُؤْلُؤًا مَّنشُورًا"** الإنسان:19, مش لؤلؤ مكنون هنا في مكانه, منشوراً لأنهم برده بيفرحوا في الجنة ويتنعموا ويسبحوا في أنهارها ولهم أصناف نعيم مهولة في الجنة.

فهمتوا يا إخواني الفرق الممتع ما بين كل آية شبه الثانية في القرآن؟ طب اللوقتي الغلمان اللي هما الخدم كأنهم لؤلؤ مكنون, يعني إيه؟ الخادم كأنه لؤلؤة من بياضه وجماله وروعته, إذا كان هذا جمال الخادم فكيف بجمال المخدم؟ إذا كان ده الخدام, أمال المخدموم جماله شكله إيه؟ علشان كده قلت لكم من شوية إن احنا بنوصف جمال الزوجة في الجنة حور عين فدلوقتي بنوصف جمال الزوج في الجنة إن الاتنين في قمة الجمال والاتنين قاعدين مع بعض في قاعدة كده على نهر الكوثر في ضيافة النبي -عليه الصلاة والسلام- بيشربوا مع بعض ويتكلموا مع بعض ويضحكوا مع بعض ويقولوا لبعض كلام حب وكلام مشاعر ويذكروا الله مع بعض, إيه النعيم ده وإيه البهجة دي؟!

خاتمة آيات الجنة

ما صبرنا عنه في الدنيا سنتنعم به في الآخرة

ندخل بقى في خاتمة آيات الجنة لما ذهلوا بقى، الحفلة الاجتماعية شوفتوا يا جماعة بتطور إزاي، الأول كانوا أصحاب في الحفلة الاجتماعية، بعد كده الملائكة جاتلهم بعد كده كل واحد دخلت عليه مراتهبقى، هو عادي الاختلاط في الجنة؟ يا جماعة الاختلاط في الدنيا محرم لأن القلوب في الدنيا مريضة، أنا مش هطمع في مراتك في الجنة ولا هبصلها أصلاً وانت مش هتبص لمراتي في الجنة، فالاختلاط في الجنة مش حرام لأن القلوب عادت سليمة، لا عادت الخمر حرام لأنها مش هتذهب العقل، ولا الحرير حرام لأن خلاص معدناش في الدنيا ولا الاختلاط حرام لأن كانت القلوب مريضة ولا المعازف حرام لأنها كانت بتشغل عن القرآن، في الجنة كل ده بقى حلال، كل ده نصبر في الدنيا وناخده في الجنة.

لحظه الذهول من النعيم

فبعد كده جه زوجاتهم دخلوا في الحفلة، فبقت تحفة مذهلة، فبعد كده أولادهم فالحفلة بقت حفلة أخوية اجتماعية أسرية ملائكية، بعد كده ربنا بعث لهم المدد في الحفلة، بعد كده قام جاي الخدم بأصناف تانية كمان في الحفلة، إيه ده يا جماعة، إيه الحفلة الاجتماعية المذهلة دي؟! فهما في وسط الحفلة يقوموا سايبين الأكل وسايبين الشرب، سايبين كل حاجة، ليه إيه ده، إحنا عملنا إيه عشان ناخذ كل ده؟!

9- "وَأَقْبَلْ بَعْضُهُمْ عَلَى بَعْضٍ يَتَسَاءَلُونَ" الطور: 25

دي بقى آيات عايزه واقفة بقى الآيات اللي بتصور لحظة الذهول من النعيم، هو إيه يارب اللي احنا عملناه عشان ناخذ كل ده، عشان ناخذ الحب ده والحياة الاجتماعية دي والنعيم المادي ده؟! "وَأَقْبَلْ بَعْضُهُمْ عَلَى بَعْضٍ يَتَسَاءَلُونَ" الطور: 25، أقبل دي فيها فرحة وفيها بهجة زي "يَا مُوسَى أَقْبَلْ" القصص: 31، تعال بقلبك ماتخافش "وَأَقْبَلْ بَعْضُهُمْ عَلَى بَعْضٍ" الكل مذهول "يَتَسَاءَلُونَ"

التساؤل إن اللي بيسأل مش عارف الإجابة واللي بيتسأل مش عارف الإجابة، الكل بيسأل نفسه ليه دول الأولاد والأحفاد والآباء دول ناس من عصور وقارات مختلفة وجنسيات مختلفة؟ الكل بدأ يتعارف على بعضه بقى، هو فيه إيه، هو احنا عملنا إيه، هو إنتوا عملتوا إيه؟ هو إنتوا إيه اللي جبكم هنا؟ "وَأَقْبَلْ بَعْضُهُمْ عَلَى بَعْضٍ يَتَسَاءَلُونَ" مذهولين بقى شغلوا عن النعيم بالتساؤل هو ربنا ادانا كل ده ليه؟!

10 - "قَالُوا إِنَّا كُنَّا قَبْلُ فِي أَهْلِنَا مُشْفِقِينَ" الطور: 26

"قَالُوا إِنَّا كُنَّا قَبْلُ فِي أَهْلِنَا مُشْفِقِينَ" الطور: 26

يعني إيه مشفقين يا جماعة؟

الإشفاق من الشفق، عارفين الشفق اللي في السما، طب وسمى الإشفاق من الشفق ليه؟ لأن الشفق رقيق جداً يعني حاجة ألوان رقيقة، فالشفقة رقة القلب، إن الإنسان كل ما يفكر حاجة بيكي، طب إيه الإشفاق، الإشفاق هو التفكير في العواقب إن الإنسان يقعد مع نفسه كده لو أنا ذنوبي ما تغفرتش هعمل إيه، طب لو أنا لقيت يوم القيامة

ببتقلي إنت داخل النار هعمل إيه، طب لو أنا في حساب الملكين ماعرفتش أثبت وأقول ربي الله -والعياذ بالله- هعمل إيه، طب هو دلوقتي إنسان قعد يتفكر في العواقب، طب لو الطاعة بتاعتي ما تقبلتش أعمل إيه، قاعد يفكر مع رقة القلب، قعد يبكي أهو ده الإشفاق، "إِنَّا كُنَّا قَبْلُ فِي أَهْلِنَا مُشْفِقِينَ"

مشفقين من إيه؟ من أربع حاجات:

- 1-يا إما مشفقين ألا تتقبل الطاعة: خايفين على الطاعات أحسن ما تتقبلش
- 2-مشفقين من ألا يتوب علينا من المعاصي: أحسن المعصية ما تتغفرش ولو ذنب واحد ما تغفرش هنروح في داهية
- 3-مشفقين على الناس، الناس اللي ماشية بتعصي ربنا دي هتعمل إيه، الكفار اللي ماتوا على الكفر دول هيروحوا جهنم هيعملوا إيه.

4-مشفقين على أولادنا وزوجاتنا: مشفقين لو مفهموش، لو ما قاموش الليل، لو مكانوش متدينين بجد وبعدين هيواجهوا العذاب إزاي، هيواجهوا العقوبة إزاي.

يبقى مشفقين، ناس خايفة، بس مشفقين ياجماعة كلمة فيها عمل، يعني الإنسان الخايف ده بيتبع الخوف بالعمل، يعني الناس دي علمت أسرها الخوف من الله بأعمالهم مش بأقوالهم، الناس دي علمت أسرها بالعمل وليس بالقول، الإتجاه للدار الآخرة، "قَالُوا إِنَّا كُنَّا" كنا كان قبل من زمان يعني خلاص كل حاجة انتهت ولم يبقى إلا النعيم ولم يبقى إلا العمل الصالح.

"فِي أَهْلِنَا" ماسبناش أهلنا كنا وسطهم، يبقى التدين مش معناه رمي المسؤولية، فيه إخوة كتير جدًا باسم التدين مش عايز يشتغل، باسم التدين رامي مراته، باسم التدين رامي ولاده، التدين مش رمي المسؤولية، التدين هو تحمل المسؤولية "إِنَّا كُنَّا قَبْلُ فِي أَهْلِنَا مُشْفِقِينَ".

11- "فَمَنْ اللَّهُ عَلَيْنَا وَوَقَانَا عَذَابَ السَّمُومِ" الطور: 27

فجزانا الله على إشفاقنا ووقانا عذاب السموم؟ لأ "فَمَنْ اللَّهُ عَلَيْنَا" الطور: 27، يعني ذكروا العمل اللي كانوا بيعملوه وبعد العمل لم تتعلق قلوبهم بالعمل فلم يقولوا فجزانا الله على الإشفاق وإنما "فَمَنْ اللَّهُ عَلَيْنَا" فذكروا العمل لأن لازم عمل، ولكن بعدها قالوا اللي احنا فيه ده محض منة من الله فهي رحمة ربنا اللي دخلتنا، شوفوا ياجماعة الفهم العميق، فاهمين قيمة العمل وفي نفس الوقت قلوبهم غير معلقة به إنما معلقة برحمة الله "فَمَنْ اللَّهُ عَلَيْنَا وَوَقَانَا عَذَابَ السَّمُومِ" الطور: 27.

"وَوَقَانَا عَذَابَ السَّمُومِ" هما ما دقوش عذاب السموم بس شافوا اللي داقوه، شافوه؛ عشان كده يا إخوانا سبحان الله العظيم ربنا واصف قبلها في آيات النار الرحلة للنار ليه؟ لأن أهل الجنة من ضمن نعيمهم أنهم يروا أهل النار وهم يُقتادوا إلى النار؛ عشان كده هو فاهم عذاب النار.

هو فهم عذاب النار منين؟

- وهو يبعدي من على الصراط شاف النار تحته، ماشي بس ده برده مش كافي لإن الناس دي بتعدي كالبرق يعني الناس دي بتعدي بسرعة.

- حاجة تانية إنه لما بينظر من نافذة من الجنة بيتكلم مع أهل النار زي في سورة الأعراف وزى في سورة الصافات **"قَالَ هَلْ أَنْتُمْ مُطَّلِعُونَ"** الصافات:54، وزى في سورة المطففين **"عَلَى الْأَرَائِكِ يَنْظُرُونَ * هَلْ تُؤْتُونَ الْكُفَّارَ"** المطففين 35: 36، يبقى إذا الناس دي بتشوف عذاب النار.

- الحاجة الثالثة يا جماعة إن الناس دي شافت المعذبين وهما بيقتادوا إلى النار فمن ضمن أصناف نعيم الجنة أن يروا اللي خدها لعبة وهو بيقتاد إلى النار بيعذب إزاي، يعني ربنا ما سهومش يحرموا إنهم يشوفوا التانيين وهما بيقتادوا إلى النار، فمعنى عجيب جداً علشان كده الناس دي فقهاء في النار فاهمين **"وَوَقَّانَا عَذَابَ السَّمُومِ"** الملائكة ما دعتناش، الملائكة ما صلتناش، ما اترمناش في توابيت منفردة في جهنم -والعياذ بالله- **"وَوَقَّانَا عَذَابَ السَّمُومِ"**.

لما تقارن بين آيات النار وآيات الجنة تلاقيهم وحدة واحدة بالظبط

تلاقي آيات الجنة يعني أهل الجنة معمول عليهم حفلة، آيات النار أهل النار معمول عليهم حفلة بالمعنى بتاعنا كده يتجرجروا قدام الناس وبعد كده برده يقفوا قدام الناس على شفير جهنم، وبعد كده يتريق عليهم ويُسخر منهم قدام الناس وبعد كده يترمو واحد واحد زي أكياس الزبالة قدام الناس، ويتقالهم كلمات الاحتقار والمهانة قدام الناس فمعمول عليهم حفلة يعني واحد بيهزأ واحد قدام الناس وفي جمهور متفرجين فييسموه عامل عليه حفلة، واخدين بالك من الكلمة يعني مصطلح يعني، فشوفوا دول بيكرموا إزاي ودول بيهانوا قدام أهل الجنة إزاي. الترابط العظيم اللي بين آيات الجنة وآيات النار إن آيات النار جابت الرحلة للنار مش جوه النار، آيات الجنة جابت النعيم اللي جوه الجنة كإن آيات النار جزء من نعيم الجنة وآيات الجنة جزء من عذاب النار

آيات النار جزء من نعيم الجنة إزاي بقى؟

آيات الجنة بدأت من أول **"يَوْمَ يُدْعَوْنَ إِلَى نَارِ جَهَنَّمَ دَعَاً"** الطور:13، إزاي بدأ من أولها إن أهل الجنة قبل ما يدخلوا الجنة قعدوا يتفرجوا على أهل النار وهما بيقتادوا إلى النار ويُدفعوا عن الجنة **"يُدْعَوْنَ"** عن الجنة، يتردوا عن الجنة، قعدوا يتفرجوا عليهم وبعد كده دخلوا يتعموا في الجنة فشفي غلهم من الظالمين اللي كانوا بيحاربوا الدين، فأيات النار كأنها جزء من نعيم الجنة.

وآيات الجنة كأنها جزء من عذاب النار إزاي؟

قول بعض المفسرين يقول لك: **"إِنَّ الْمُتَّقِينَ فِي جَنَّاتٍ وَنَعِيمٍ"** الطور:17، المخاطب هنا هو أهل النار إن بعد ما اترموا في النار وقاسوا حرها يقوم ربنا يقولهم استنوا أما أقولكم أهل الجنة بيتعموا إزاي، فكل وصف نعيم أهل الجنة بينزل زي مكوى جهنمية على قلوب أهل النار وهم يعذبون فهذا من إعجاز القرآن يا إخوانا إن آيات النار

جزء من نعيم الجنة وآيات الجنة جزء من عذاب النار وكل ده بسبب هذا السياق العجيب "فَمَنْ اللَّهُ عَلَيْنَا وَوَقَانَا عَذَابَ السَّمُومِ" الطور: 27، جاية من تخلخل مسام الجسد، ربح النار التي تتخلل مسام الجسد -والعياذ بالله- "وَوَقَانَا عَذَابَ السَّمُومِ"

12- "إِنَّا كُنَّا مِنْ قَبْلُ نَدْعُوهُ ۗ إِنَّهُ هُوَ الْبَرُّ الرَّحِيمُ" الطور: 28

"إِنَّا كُنَّا مِنْ قَبْلُ نَدْعُوهُ" ندعوه مضارع يفيد الاستمرار يعني احنا كنا في الدنيا على طول يارب، نصحي قبل الفجر يارب نجنا من النار وارزقنا الجنة، على طول بين الآذان والإقامة يارب نجنا من النار وارزقنا الجنة، كإن أهل الجنة لما دخلوا الجنة قالوا إن السبب في دخولنا الجنة لو كان في عمل هو اللي دخلنا الجنة هو الدعاء، العمل الوحيد اللي احنا نقدر نقول إن هو سبب في دخولنا الجنة هو الدعاء، شوفتوا خطورة الدعاء يا جماعة يعني أهل الجنة يقولوا من جوه الجنة احنا دخلنا الجنة بالدعاء

"إِنَّهُ هُوَ الْبَرُّ الرَّحِيمُ" البر المرة الوحيدة التي ذكر فيها اسم الله البر في القرآن في سورة الطور وهو من الأسماء العظيمة.

من معاني البر

- زي البر بتاع البحر اللي هو الأمان

بعد البحر المتلاطم الأمواج المرعب جينا للأمان، إنك كل ما بتقربي من ربنا إنت بتقربي من الأمان كل ما بتقربي من النجاة.

- ومن معاني البر اللي بيبر دعائك فلا يسقط لك دعوة: بيستجيب لكل الدعاء

-ومن معاني البر اللي بيبر عبادتك: فلا يضيع عليك حسنة واحدة في سجدة واحدة عملتها

- ومن معاني البر اللي بيبر وعوده: اللي ولا وعد وعدنا بيه إلا وهايدهولنا

- ومن معاني البر اللي بيغمر عباده بالإحسان الفاضل: وبيؤنسهم بأحبابهم وهو ده اللي حصل في الجنة لما دخلوا الجنة.

اشمعنا جابو اسم الله البر؟

لإنهم وصلوا للنجاة بعد رعب يوم القيامة ولإنهم لاقوا إن كل عمل عملوه ربنا اداهم ثوابه في الجنة بر عبادتهم، ولقوا إن كل دعوة دعوها لربنا ربنا اداهم استجابتها فبر دعاؤهم، وكل وعد ربنا وعده ليهم ربنا لو أطاعوه اداه ليهم في الجنة فبر وعوده، ولإن ربنا غمرهم بالجو الاجتماعي فغمرهم بالأنس والإحسان العظيم؛ عشان كده اسم الله البر هنا اسم خطير، فيه درس يعني هتلاقوه على أنت لو كتبتوه على جوجل اديته قبل كده اسمه "المعاني العشر

لاسم الله البر"، فيه معاني مهولة لهذا الاسم العظيم "إِنَّهُ هُوَ الْبَرُّ الرَّحِيمُ" الطور: 28

طب وليه الرحيم جت بعد البر؟

لإن النصرى يقولوا لازم نبقى أبرار يعني لازم نبقى أطهار بس ماينفعلش يبقى فيه بر بالعمل، قال لك الإنسان لو قعد يصوم كل يوم ويقوم الليل كل ليلة برده مش هيطهر، ليه؟ الإنسان نجس، هوا ده كلامهم الإنسان نجس مهما عمل، مهما عمل، طب الحل إيه؟ الحل إن ربنا ينزل يدبح، بس هوا ده الطريق الوحيد اللي الإنسان يبر، فيبر مفيش فيه رحمة، يعني بر مفيش فيه رحمة إنما عندنا في الدين البر، بر ربنا بينا لو عملنا الأعمال الصالحة ربنا هيطهرنا بسببها ويزكي نفوسنا بسببها فبر فيه رحمة، ربنا رحمننا، طهرنا برحمة - سبحانه وتعالى - مش بآلام "إِنَّا كُنَّا مِنْ قَبْلُ نَدْعُوهُ" إِنَّهُ هُوَ الْبَرُّ الرَّحِيمُ" الطور: 28

العلاقة بين كلمة ندعوه وكلمة البر

إن ربنا بر الدعاء بتاعنا، فيه قراءة في الآيات دي يا جماعة أَنَّهُ هُوَ الْبَرُّ الرَّحِيمُ يعني إيه؟ يعني كنا بندعوه لما لقينا في الدنيا إنه بر رحيم فقلنا هيبير دعاءنا لما ندعوه بالجنة فداعيناه بالجنة والنجاة من النار فربنا بر دعاءنا يعني كل نجاتهم بسبب إنهم عرفوا اسمين من أسماء الله، إنهم عرفوا اسم الله البر واسم الله الرحيم فلما عرفوه وشافوا بر الله ورحمته راحوا رفعوا أيدهم ودعوا فدلّموا دعوا استجيب لهم فدخلوا الجنة بسبب اسمين من أسماء الله الحسنی، يا للي مقصّرين في التعرف على أسماء الله الحسنی، يا للي لما قتلوكوا اللوقتي اسمعوا درس المعاني العشر لاسم الله البر قتلوا هوا احنا قادرين كويس إن احنا بنسمع التفسير وخلص ومكسلين تسمعوا دروس أسماء الله الحسنی، اسمين بس من أسماء الله الحسنی ربنا أنقذ بهم المصير بتاعهم.

آيات عظيمة قوي يا جماعة

وآيات جميلة قوي وآيات مبهرة يا جماعة، إحنا في حلقة الليلة واحنا عايشين مع آيات الجنة اللي أنا قلبي مش جايبني إن أنا أسيبها، يعني خلاص لسه لنا اللوقتي دقائق وتخلص الحلقة، يعني فالمفروض إن احنا بقى نخرج من الرحلة المهولة دية في سورة الطور، قلوبنا عاشت مع قدرة الله في مقدمة السورة، بعد كده عاشت مع يوم القيامة المور والسير والويل، وبعد كده عاشت مع النار والاختياد والدع والصلي والشوي -والعياذ بالله- والرحلة المرعبة بتاعة النار اللي كانت تحت أعين أهل الجنة وهما بيتفرجوا عليها وبعد كده بقى أهل الجنة شافوا أهل النار وهما بيتردوا من على الجنة وبعد كده اتفتحت لهم الجنة دخلوا، لقوا النعيم المهول العظيم اللي قلوبنا، يعني قلوبنا في السما اللوقتي واحنا قاعدين بنتكلم عنه ونسمعه من كتر ما الألفاظ بتتطق والله العظيم يا جماعة والله العظيم أنا حاسس إن الألفاظ بتتطق،

أنا حاسس إن الحروف بتتطق، أنا حاسس إن ترتيب الآيات بتتطق، أنا حاسس إن فعلاً نعيم مذهل يارب متحرمناش منه بعد ما شوقتنا إليه يارب العالمين.

ياذن الله الحلقة الجاية هنبداً من أول "فَذَكِّرْ فَمَا أَنْتَ بِنِعْمَتِ رَبِّكَ بِكَاهِنٍ وَلَا مَجْنُونٍ" الطور: 29.

الانفوجراف (ملخص الحلقة)

وندخل بقى دلوقتي بإذن الله نتكلم عن الانفوجراف اللي هنلخص به الحلقة؛ عشان نستوعب المعاني كويس، ميقاش كلام بنقوله وخلاص لأ، ده احنا بنلخص ونرتب ذهننا عشان يبقى مش كلام وعظي، لأ ده احنا بناخد الكلام وبنحفظه وبنفهمه وبنذاكره وبنمتحن عليه وبنأخذ عبرات كمان بإذن الله.

عشنا يا جماعة بقلوبنا في الحلقة بتاعة النهارده

مع ثاني أعظم نعيم في الجنة بعد النظر لوجه الله وحياة اجتماعية في الجنة، عشنا يا جماعة مع برومو عن الجنة بيوصفنا مدى البدائع اللي في الجنة.

قلنا في الأول ليه الكلام عن الجنة بالطول ده في سورة الطور

لإن احنا في عام الحزن القلوب تعبانة فاحنا محتاجين اللوقتي إن إحنا نسمع عن الجنة كثير؛ عشان نصبر.

طب ليه الكلام عن الحياة الاجتماعية بالذات في الجنة؟

لإن احنا دلوقتي معزولين عن المجتمع في عام الحزن بعد شعب أبي طالب فأكثر فترة تعزل فيها الصحابة عن المجتمع فأكثر فترة محتاجين ربنا يرقق قلوبكم بإنكم هتأخذوا جو اجتماعي عظيم بسبب صبركم وثباتكم.

وعشنا يا جماعة مع ظاهرتين مذهلتين في الآيات

- أول ظاهرة: الحياة الاجتماعية المذهلة

شوفي الزوج والزوجة في الجنة **"وَزَوْجَانَهُمْ بِخُورٍ عَيْنٍ"** الطور: 20، مش هحرمك من مراتك، أولادك مش هحرمك منهم **"أَلْحَقْنَا بِهِمْ ذُرِّيَّتَهُمْ"** أصحابك مش هحرمك منهم **"مُتَكَبِّرِينَ عَلَىٰ سُرُرٍ مَّصْفُوفَةٍ"** الخدم مش هحرمك منهم، معية الله **"وَأَمَدَدْنَاَهُمْ بِفَاكِهَةٍ وَلَحْمٍ"**، ملايكة، مش هحرمك من صحبة الملايكة **"كُلُوا وَاشْرَبُوا هَنِيئًا"** يعني تخيلوا الجو الاجتماعي المذهل اللي لا يوجد واحد على الألف منه في أعظم منتجع سياحي في العالم.

- الظاهرة المذهلة الثانية اللي في الآيات الحب المذهل

الحب المذهل اللي ما بين الزوج والزوجة، الحور: من معاني الحور الميل يعني ميل المشاعر، بتحبه قلبها مايل ليه، مش قادرة تشيل عينها من عليه، **"وَأَقْبَلْ بَعْضُهُمْ عَلَىٰ بَعْضٍ"** أولاده جاين بقلوب **"وَأَمَدَدْنَاَهُمْ بِفَاكِهَةٍ وَلَحْمٍ مِّمَّا يَشْتَهُونَ"** ربنا بيديله اللي بيحبه لأنه بيحبه، أصحابه بيحبه، **"يَتَنَزَّعُونَ فِيهَا كَأْسًا"** يبقى نفسه في الكأس اللي قدامه ويديها لأخوه لأنه بيحبه، الخدم بتحبه **"وَيَطُوفُ عَلَيْهِمْ غِلْمَانٌ"** الخدم رايعين جاينين، رايعين جاينين بأصناف النعيم.

بعد كده يا جماعة شرحنا الآيات بقى الحفلة الاجتماعية المذهلة اللي في الجنة

اللي الآيات بتصورها من أول **"فَاكِهِينَ بِمَا آتَاهُمْ رَبُّهُمْ"** لما الصحبة اتلمت في قصر واحد منهم، وبدأوا يضحكوا مع بعض ويفتكروا نعيم الجنة اللي ربنا اداه لهم والنجاة من عذاب النار وبعد كده الملايكة دخلت **"كُلُوا وَاشْرَبُوا هَنِيئًا"** الملايكة دخلت تحتفل معاهم بالحفلة الجميلة دية،

وبعد كده مراته دخلت، كل واحد زوجته دخلت عليه **"وَزَوْجَانَهُمْ بِحُورٍ عِينٍ"** وقلنا إن الاختلاط في الجنة مش حرام لأن مفيش حد هيبص لمرات حد، مفيش حد عنده شهوة غير لزوجه ولا واحدة عندها شهوة غير لزوجهها والكل فرحان وسعيد وبعد كده ولاده دخلوا عليه **"أَلْحَقْنَا بِهِمْ ذُرِّيَّتَهُمْ"** المنظر قعد يكبر يكبر وجو البهجة الاجتماعية في الحفلة الاجتماعية قاعد يكبر، وبعد كده كمان جه الخدم ودخلوا **"وَيَطُوفُ عَلَيْهِمْ غِلْمَانٌ"** يعني منظر حفلة اجتماعيه مذهلة في الجنة.

فجتم في الآخر سابوا النعيم وسابوا الحفلة وبدأوا يتساءلوا

"وَأَقْبَلْ بَعْضُهُمْ عَلَى بَعْضٍ يَتَسَاءَلُونَ" هوا احنا خدنا كل ده ليه؟ قالوا خدنا كل ده لأن احنا كنا **"مُشْفِقِينَ"** خايفين على الناس من النار، خايفين على ولادنا وزوجاتنا من النار، خايفين على نفسنا من النار وتحملنا مسؤوليتنا في أهلنا مسبناش بيوتنا وتخلينا عن مسؤوليتنا باسم الدين، لأ باسم الدين شيلنا المسؤوليات فربنا من علينا مش بسبب عملنا لأ ده منه من الله **"وَوَقَانَا عَذَابَ السَّمُومِ"** ليه؟

"إِنَّا كُنَّا مِنْ قَبْلُ نَدْعُوهُ" بسبب كلمة يارب، دخلنا الجنة بسبب كلمة يا رب، بسبب إن احنا كنا مواظبين على الدعاء على طول على طول.

"إِنَّهُ هُوَ الْبَرُّ الرَّحِيمُ"

المرّة الوحيدة اللي ذكر فيها اسم الله البر في القرآن كله ذكر من جوه الجنة، أهل الجنة لما شافوا ربنا برّ وعوده بيهم قد إيه وبرّ عبادتهم وبرّ دعائهم وما أسقطش ولا دعوة ليهم قد إيه قالوا ربنا هو، **"هُوَ الْبَرُّ الرَّحِيمُ"**

وقلنا يا جماعة معنى بديع

في العلاقة بين آيات النار اللي شرحناها الحلقة اللي فاتت وآيات الجنة اللي شرحناها الحلقة دي، آيات النار مابتوصفش حال أهل النار جواها إنما بتوصف الرحلة ليهم وهما بيدعوا إلى النار وآيات الجنة مابتوصفش الرحلة للجنة إنما بتوصفهم وهما قاعدين في حفلة جوه الجنة كإن الأول ربنا فرج أهل الجنة على أهل النار وهما بيتردوا من على أبواب الجنة ويتردوا لحد ما بيوصلوا لجهنم، وبعد كده دخلهم الجنة يتنعموا بالحسنات بتاعتها فكإن آيات النار جزء من نعيم الجنة، جزء من المشاهد اللي تنعم بها أهل الجنة وهما بيشفوا اللي عذبوهم في الدنيا واللي انتهكوا حرمت الله في الدنيا واللي تجرؤوا على الحق ومنعوا الدعاة إلى الله في الدنيا وبعد كده جت آيات الجنة جوه الجنة كإن بعد ما أهل النار دخلوا النار ربنا يقول لهم أحوال أهل الجنة إيه.

فوصلنا إلى شيء مبهر وهو إن آيات النار في سورة الطور جزء من نعيم الجنة وأن آيات الجنة في سورة الطور جزء من عذاب النار في ترتيب إعجازي بديع مهول في هذه المعاني اللي لو قمنا الليل بيها وعشنا معاها قلبنا هيتملى إيمان يا إخواني في الله.

-آيات الجنة في سورة الطور

في نهاية الحلقة إخواني وأحبابي وأخواننا الكريمات الفاضلات، يعني شفتوا يا جماعة واحنا عايشين مع الجنة النهاردة، شفتوا يا جماعة آيات الجنة في سورة الطور بتتكلم عن الحياة الاجتماعية ليه؟ لأن سورة الطور نازلة في وقت غربة اجتماعية.

-آيات الجنة في سورة الذاريات

بتتكلم عن الرزق وعطاءات الله من الرزق لعباده "آخِذِينَ مَا آتَاهُمْ رَبُّهُمْ" الذاريات:16، لأن سورة الذاريات بتتكلم عن الرزق وإزاي إن الإنسان قلبه يتعلق بالله وحده في الرزق.

-آيات الجنة في سورة القمر

بتتكلم عن النظر لوجه الله "فِي مَقْعَدِ صِدْقٍ عِنْدَ مَلِكٍ مُّقْتَدِرٍ" القمر:55، لأن في شواهد إن سورة القمر نازلة في شعب أبي طالب، في وقت عذاب رهيب وحرمان وحصار فرينا بيقول لهم اصبروا عشان تنالوا أعظم نعيم وهو النظر لوجه الله لأ يعني فهما في فترة صعبة فالازم يرتبطوا بروحانيات مايجيش هنا نعيم مادي هنا نعيم روحاني عشان يقدرُوا يصبرُوا على الأذى المادي اللي هما فيه.

-آيات الجنة في سورة النبأ

جت بقى "وَكَوَاعِبُ أُنثَرًا * وَكَأْسًا دِهَاقًا" النبأ 33:34، زوجة جسدها جميل وكأس خمر مليانة، هو إيه النعيم مادي أوي كده ليه؟ لأن سورة النبأ في أول المرحلة الجهرية بتكلم شباب مكه اللي بيقع في الزنى ويشرب خمر، بيقول لهم تعالوا لربنا فالشباب هيقولوا احنا بنعمل معاصي مش هنقدر نسيب المعاصي ونيجي فبنقول لهم الجنة فيها أجمل من اللي إنتوا فيه ده زي بالظبط كده لما تعدي جنب ولد يبص على بنت تقوله الجنة فيها اللي أحلى منها أهو كده.

عشان كده كل سورة النعيم بتاع الجنة متناسب مع موضوع السور ومتناسب مع زمن نزول السورة.

وده من أروع أنواع إعجاز القرآن، إعجاز التناسب والتناسق وإن مفيش آيات الجنة بتاعة سورة الطور مينفعش تيجي في الذاريات، آيات الجنة بتاعة الذاريات مينفعش تيجي في القمر، آيات الجنة بتاعة القمر النعيم الروحاني لا يمكن تنفع تيجي بالمنظر ده في سورة النبأ، ليه؟ النبأ أنا بكلم شاب بيتلذذ بمتع مادية فبقول له المتع المادية اللي في الجنة إيه الإعجاز ده، إيه الجمال ده، إيه الروعة دي؟! كلام ربي، كلام ربي، كلام الله يا جماعة، كلام ربي، كلام الله اللي نزل من فوق سبع سماوات عشان ينور لنا حياتنا وينور لنا طريقنا، الحمد لله على نعمة إن احنا قاعدين نفهم في كتابك يا رب وبكلامك يا رب.

الخاتمة

ذاكروا، قوموا الليل، من أراد الطريق إلى القرآن فعليه بالفهم العميق زي الشرح اللي احنا بنقوله في التفسير عشان تروحوا تقرؤوا من التفاسير وتفهموا والإتصال الوثيق تقوم الليل بسورة الطور وتعيشي معاها والقلب الرقيق زي دوام ذكر الله؛ عشان قلوبنا ترق؛ عشان نعيش مع القرآن الكريم ونعيش مع هذه المعاني، شدوا حيلكو يا جماعة مع آيات القرآن الكريم.

ربنا يبارك فيكم، ربنا يحفظكم، ربنا يسددكم، ربنا يشبتكم، سبحانك اللهم وبحمدك، أشهد أن لا إله إلا أنت، أستغفرك وأتوب إليك.

مستنيين مداراساتكم في الصفحة الرسمية على النت، مكتوبة قدامكم الصفحة الرسمية للدكتور حازم شومان، مستنيين مداراساتكم ياللا؛ عشان نعمل حلقة المدارس إن شاء الله في أقرب وقت بإذن الله، مستنيين مداراساتكم، المذكرات بتنزل، ذاكروا يا إخواننا يلا عشان امتحان القرآن غيرني في شهر رجب بإذن الله -سبحان وتعالى- ربنا يبارك فيكم وربنا يجعلنا من أهل القرآن، مرة ثانية: سبحانك اللهم وبحمدك، أشهد أن لا إله إلا أنت، أستغفرك وأتوب إليك، وجزاكم الله خيراً.

تم بحمد الله

شاهدوا الدرس للنشر على النت في قسم تفرغ الدروس في [منتديات الطريق إلى الله](http://forums.way2allah.com) وتفضلوا هنا :-

<http://forums.way2allah.com/forumdisplay.php?f=36>